



Siverth K. Heilmann

24. September 2019

UKA 2019/165, 166 aamma 135

Uunga siunnersuut: Eqqusuinermi akitsuutit pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2019-imeersoq. (Plug-in hybridbiilit akitsuutaat, biilinit innaallagissamik imaluunniit brintimik ingerlatalinnut akitsuummik akiliisussaanginneq kiisalu qamutit motorillit nunaannakoorutit minnerusut akitsuutaannik atorunnaarsitsineq)

(Partii Naleqqamit Inatsisartunu ilaasortat)

Uunga siunnersuut: Qamutit motorillit akileraarutaat pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2019-imeersoq. (Qamutitut motorilinnut taamaallaat innaallagissamik brintimilluunniit ingerlatilinnut plug-in hybridbiilinullu akitsuut, qamutitut motorilinnut nunakoorutitut mikinerit akitsuuteqartitsinnginneq kiisalu akiliinissamut piffissaliussamik allanngineq)

(Partii Naleqqamit Inatsisartunut ilaasortat)

Qamutit motorillit akileraarutaat pillugit Inatsisartut inatsisaata allanngortinnissaa, imaalillugu ATV-it taakkunungalu assingusut qamutit motorillit nunakoorutit mikinerit sisamanik amerlanernilluunniit assakaasulblit ukiumut akileraarutaat 2.000 kronemut appartinnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Stine Egede, Inuit Ataqatigiit)

Siullermik Partii Naleqqamit imm. 165 eqqusuinermi akitsuutit pillugit Inatsisartut inatsisaata allangortinneqarnissaanut tunngatillugu ATASSUT-mit imatut oqaaseqarfigissavarput.

Inatsisartuni inuiaqatigiinnilu tamatta, ilami nunarsuarmi amerlaqisuni mingutsitsineq akiorniarlugu oqallisiginnileruttorfitsinni, biilit innaallagissamik ingerlatilinnut, brintimik ingerlatillit aamma plug-in hybridbiilinit akitsuutinik akiliinngikkallartarnissamik aalajangersimanerput 1. Januar 2020-imi Partii Naleqqamiit atorunnaassinniarneqarpoq.

Akerlianik qamuterallannut kiisalu qamutitut motorilinnut nunakoorutitut minnerusunut, orsussamik imerpalasumik ingerlatillit CO2-mik annertoqisumik aniatitsisut amerliartuinnartullu, eqqusuinermi akitsuuserneqartarnerat atorunnaarsinniarneqarpoq.



ATASSUT-mi Iisimavarput qamuterallappassuit periuitsit assigiinngitsut atorlugit ajunaarutaasartut aammalu qamutit mootorillit nunaannakkoortit savaatilikormiunut, inuussutissarsiutigalu piniarnermi atorneqartartunut akitsuusersuineq allatulluunniit aalajangersaaneq artukkiinerunngitsumik paaseqatigiiffiunerusumilli nalimmassaanissaq anguniarneqartariaqartoq.

Illoqarfinni nunaqarfinnilu aammalu pinngortitami mingutsitsinerujussuarput eqqartortuarlugu, massakkut siunniunneqarpoq ikuallaavioqarfioreersut saniatigut, Nuummi Sisimiunilu eqqagassarpassuit mingutsitsinerup annikillisarniarneqarnerani ikuallaavissualiorqartariaqartoq.

Ilangullugu ATASSUT-mit inatsisartunut inassutiginarpoq, eqqaavissuarnut tunniussisarnerup pilerinarsarnissaanut akitsuusiunneqartartut pioreersup iluani avatangiisinut aningaasaateqarfiup ingerlallualernissaanut illikartitsisoqartarnissaa, taamaalilluni eqqaavissuarmut igitsineq annertunngitsumik aningaasarsissutigineqartalernissaa piviusunngortinneqarnissaanut aqutissiuussissasugut.

ATASSUT-mit isumaqarpugut, siunnersuut siullermeerneqarnerani itigartiinnarnagu pitsaaqutit ajoqutillu pillugit suliap aappassaaneerneqartigani ataatsimiititaliami susassaartumi nalilersuilluarnissaq avaqqunneqarsinnaanngitsoq.

Partii Naleqqap aappaatut qamutit mootorillit akileraarutaat pillugit Inatsisartut inatsisaata allanngortinneqarnissaa pillugu imatut naatsumik ATASSUT-mit oqaaseqarfigissavarput.

ATASSUT-mit imm. 165-imut oqaaseqaatigut innersuussutigalugit, inatsisissatut siunnersuutaasoq qamutit mootorillit nunakkoortit mikinerit snescooterillu qamutitik mootorilinnik akitsuuteqartarunnaarnissaanik imalik, suliap aappassaaneerneqannginnerani peqqissaarullugu ataatsimiititaliami susassaartumi suliareqqaarneqarnissaa inassutigissavarput.

Inatsisartuni ilaasortap Stine Egede-p, Inuit Ataqatigiit, qamutit mootorillit akileraarutaat pillugu Inatsisartut inatsisaata allanngortinnissaa, ATV-it taakkunungalugu assingusut qamutit mootorillit nunakkoortit mikinerit sisamanik amerlanernilluunniit assakaasullit ukiumut akileraarutaat 2.000 kronemut appartinnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut, imatut naatsumik ATASSUT-mit oqaaseqarfissavarput.

ATASSUT-ip akitsuummik appartitsinissamik siunnersuuteqartup tunngaviatigut tapersorsornartipparput, taamaattorli siuliini oqaaseqaatigut innersuussutigalugit pingaartillutigu ataatsimiititaliami susassaartumi nalilersorluarneqarnissaat.

Ataatsimiititaliaq sulilluarnissaanik kissaapparput suleqataalluarnissarpullu neriorsuutigissavarput.